

reddita. Dixerat alter senex, se vidisse Susannam cum Juvene ὑπὸ πείρου *sub prino*, cui respondet Daniel Græcus, *expectat te angelus Dei gladium gerens πείρου ὅς μέσσην discindere te medium.* Quia tales vocum allusiones neq̄ in hebraica neq̄ in chaldaica lingua dantur, certum est, historiam Susannæ neq̄ ab hebræo Habakuko, neq̄ a chaldæo Daniele esse scriptam Conf. Hieron. Praef. in Daniel.

§. 12.

Belis & Draconis historiam, quam Eusebius Apollinarius & Hieronymus Habakuko attribuunt, ab eo non scriptam esse, temporis ratio indicat. In Graeco Daniele Cap. XIII. v. 65. utraq̄ historia ad Cyri tempora refertur, hoc enim indicant verba; *Cum Rex Astyages concessisset ad majores suos, Cyrus Persa regnum ejus excepit. Vivebat autem una cum Rege Daniel &c.* Ponamus Habakukum annos triginta natum propheticum officium suscepisse, quod ad minimum tertio anno ante primam Nebucadnezaris invasionem juxta calculum Usserii Anno mundi 3395. & ante Chr. natum 609. factum est. Deinde a prima Nebucadnezaris invasionem usq̄; ad Cyrum Babyloniis imperantem numerantur 70. anni. Ex quo calculo sequitur, Habakukum centenarium fuisse, qualis senex suis messoribus non apportat cibos, quod refertur in draconis fabula. Ceterum ea, quae de cibo Beli, de idolo ejus Danieli tradito & destructo, de ratione, qua Daniel & sacerdotum fraudes detexit, & quae reliqua sunt ejusdem generis, fabulam aperte redolent. Sic reliqua, quae de dracone a Daniele interemto & quae de ipso Daniele per sex dies in foveam leonum coniecto, Habakuki cibo sustentato, & deniq̄; liberato narrantur, luculenter indicant, autorem veram historiam Daniel. VI.